

Waraga ya Bölis ma co Kürünsüs ya Eera ya Tafa'da tumma

Bölis arigiri waraga ya ungu co kadu ma kaniisa ka Kürünsüs anya ma Yünan ma dhabbu mo, kini ka tunggeene ka fiini ma tara co tassa kene. I'i agadünnü tumma ma İnjüli co eene a kadu tamma ka Yasu kadhabbu. I'i aguu'bu eege ka nanggeedi iini ka ticci kene kanna nja iini ka arigiri ada nawaraga co eene lakiini kaleefe tatoroko eene ku'bu. İkirı ka tarigiri waraga ya ma takinyi tagi'di tanno eene ku'bu a'da üfürü tala eege ka oona.

Afeene afa kadu ma kaniisa ka Kürünsüs kafünü eema a Bölis ka oona a'da i'i atamü gürüüsü ya kadu ka kürünügi iini ma co tunggu co kadu ma kaniisa na eema ka titaalo kene no, a'da taalo tafiini. Ka waraga tiya, i'i arigiri tumma ma eyi tiya iini dhabbu nja linggo ma teema tumma ma İnjüli ma Yasu ya Masala ka tagümmünü i'i iini ya. I'i afe'de agalaana kadu ma kaniisa a tumma ma tafa ka gürüüsü tiya eene ta'diila amang kene tamana a kadu tanno Masala nja linggo ma kaniisa ka na'buugu tökönö (2 Kürünsüs 9.10).

¹ A'a na Bölis tafiini ya Yasu Almasihi a tasaasa tanno Masala, a'a nja örre ma angnga Timosaws ungngo tunggu waraga ya co kaniisa tanno Masala ka Kürünsüs nja kadu ma kaniisa

nye'd'de ka Akaiya. ² A Masala ma Pupa tiya aja nja Uugaara tiya aja Yasu Almasihi tanangnga türü aaga nja ta'diila.

Bölis amana ta'diila a Masala

³ Kada nangnga ta'diila a Masala Pupa tiya Uugaara yaaja Yasu Almasihi, Pupa ya ana 'bangnga ya, nja Masala ma alüülü angnga ka iye. ⁴ I'i alüülü angnga ka iye ka dhügürü tiya aja ya in'dili amang kaja tambaanya talüülü kadu na dhügürü no ka iye a talüülü tanno iidi ka'duga ka Masala ka eyi tiya iidi no. ⁵ Afa maaja kagosso ka dhügürü ma Almasihi, angnga afe'de kagosso ka talüülü iye. ⁶ Üürü unngo kadhügürü unngo kalüülü aaga ka iye nja toolona kidi kara talüülü iye, talüülü iye naada eege kamiini ya anangnga aaga ka tidhi oona ku'bu a tümünü eedi ku'bu ma dhügürü tiya ungodho ya iidi kadhügürü ya. ⁷ Tindhigi iidi kada kütü ka ööye miini ka takardha ku'bu ma tindhigi Masala, kudumma iidi ka tussu afe'de aaga toso ka dhügürü tanno iidi, afe'de kosso aaga ka ta'baga nanggeedi tanno aja.

⁸ Nagöre niidi taalo unngo kasaasa aaga katüürü ma tatoroko tanno agalinggo adene ana unngo ka Asiya no, eema ya agalinggo adene ana unngo ya adhabbu indhi unngo taalo ka kambaanya unngo taalo kamma a'da ara unngo tefe ka 'di. ⁹ Kiki unngo kide dhorro kidi ka nanggeedi a'da kagümmü adene ma inde, tumma kagüünü adene amang kidi tafa türü ka nanggeyi tanno iidi ka oona, lakiini ka Masala tammo iji kadu na ake no. ¹⁰ Oogo moolona

ungngo ka tatoroko ma inde afa ma tanno, oogo mara toolona. Kümümü angnga nanggeyi niidi oono ma tindhigi oogo kono ka tutu ka katoolona ungnngo. ¹¹ Afa maada ka takinyi ungnngo a tafara ka Masala tanno ada. A'da kadu kadhabbu kamana ta'diila a Masala ka üüdü ma ungnngo, a Masala mara tanangnga baraka ya a'diila ya ungnngo kono ka tamma kafara tanno kadu kadhabbu.

Bölis agere tumma niini

¹² A 'bitingngö kabbü ungnngo 'daniisö ma nanggeedi tanno niidi, yungngo iki ungnngo a'da taneene niidi ka 'büdhülü nja taneene tanno iidi nja aaga no, ka tiicolo türü na Masala eege kamiini taalo a ta'dara ma tamö'di, lakiini a türü tanno Masala. ¹³ Taalo ungnngo karigiri ada tumma no co aaga no ada kara tiiröönö aaga tussu no, a'a nasaasa aaga a'da aaga tussu nye'd'de. ¹⁴ Afa maada ka tussu ungnngo ara aaga saga tussu ungnngo nye'd'de aaga tabbü 'daniisö ana ungnngo afa mungngo kara tabbü 'daniisö ana aaga ka uuru tanno Uugaara Yasu.

¹⁵ Nakussu a'a tumma no nye'd'de kede ka tasaasa tö'dö kada kannu ka dhidha amang ka türü tagusunja aaga teera. ¹⁶ Kede kara co Makadoniya, ara a'a tadho kada kannu, a kede kara tafada ka Makadoniya ya, ara a'a tö'dö kada amang kada tattogo a'a ma co a Yahüüdiya. ¹⁷ Kede ka tasaasa tumma 'dee, nakiisini ömö'di alla nagalinggo a'a kada midhi, ara a'a tiki a'da ii ii nja kaw kaw ta ungnngo kafeene co? ¹⁸ Masala mussu a'da tumma niidi nja aaga no,

taalo kiki ii nja kaw, ¹⁹ Kudumma i'i ya 'Bii'bala ma Masala yiidü kadeema tumma miini nja aaga, ungnö nja Salwans nja Timosaws, taalo kiki ii, alla kaw, lakiini kini taalo kaw illi ii ya miini. ²⁰ Ii ya miini ka tumma tanno in'dili, nggeege yungnö iidü ka tiki a'da "Amiin" ana Yasu Almasiichi a tindhigi ko'do ma tidhindhi ma Masala. ²¹ Masala oogo mungnö manangnga angnga ka takardha ku'bu ana eere ma Almasiichi oogo mungnö ma'bunaana angnga. ²² Oogo mabbünnü hitimi yoono kaja ka oona, manangnga Koronggore yoono kaja ka nanggeedi.

²³ A Masala tussu a'da nanu a'a ka öödö ka Kürünsüs, a 'bangnga ma aaga kagu a'a. ²⁴ Taalo ungnö kasaasa ta'bunu aaga ka tamma ka Masala, lakiini ungnö ka linggo nja aaga amang kada ta dhodho kudumma maada katütü ka tamma ka Masala dhorro.

2

¹ I'i yungnö eede ka tiki a'da nafa tö'dö kada kannu iidü a'a tanangnga aaga ka tümümü nanggeedi a'a a tagoroo'bo. ² Kudumma eede kara tanangnga aaga ka tümümü nanggeedi 'dee, a mada i'i yungnö ara tanangnga a'a ka tadhodho afa taalo kadu neede ka anangnga eege ka tümümü nanggeedi ka koroo'bo no? ³ A'a narigiri waraga ya kudumma tanno kede kara tö'dö kada nafa tanangnga kadu na amana a'a ka tadhodho tafa tanangnga a'a ka koroo'bo. Nussu tumma aaga nye'd'de dhorro a'da ara aaga toso ka dhodho nja a'a aaga in'dili. ⁴ Narigiri ada a'a waraga ya co aaga ana eedi ka ticine a tatoroko

nja tadinigöögö ma eedi a fara tasuuru kede ka iyye, tumma neede no 'do ya a'a taalo nasaasa tanangnga aaga ka koroo'bo, lakiini a'a nagala ka asaasa a'da aaga tussu a'da nasaasa a'a aaga dhorro.

Taadha ka tatoroko tanno kadu

⁵ Lakiini ömö'di ya ö'dö a tagoroo'bo ya, taalo anangnga a'a ka koroo'bo ungodho a'a, lakiini anangnga aaga ka koroo'bo nye'd'de kungngo, lakiini taalo tagoroo'bo in'dili, iidi tumma tadhabbu ka indhi kini. ⁶ Anda'dimo ka takapusu adene tanno ömö'di tiya ada kada kalinggo ana i'i aaga in'dili kungngo. ⁷ A 'bitingngö a'diila ada kara tafünügü i'i ko'do aaga tafa kini iidi tagoroo'bo dhindho. ⁸ Ara a'a tiki aaga a'da aaga takogoona ma tasaasa i'i dhindho. ⁹ A'a narigiri ada aaga tumma no co aaga amang kede tussu a'da kaföonyö aaga tumma neede nye'd'de. ¹⁰ Kada kara ta'diila nja ömö'di ka tatoroko tanno iini ya, na a'a taadha ka ömö'di ka tatoroko tanno iini, ara a'a taadha kini kide kidha ma Almasihi kudumma aaga. ¹¹ Kudumma Ebliisi kara tanggaaga tii'bi angnga, taalo angnga küürü ma tumma niini.

Kadu ma linggo ma timi'di tumma ma 'bitingngö

¹² Kede ka öö'dö ka Tarwas ma teema tumma ma sorne tanno Almasihi a fiini ma linggo ma Uugaara tafa'da nja a'a. ¹³ Lakiini a'a naga tinigöögö kudumma eede taalo naduna örre ma a'a ya Tito ya kannu, kikiri ka tattogo a'a nunggeene naco Makadoniya.

14 Tanangnga ta'diila a Masala tammo unggeene ana angnga ka fiini ma tii'baana 'bucca ana Almasihi. Masanna kondho ma tussu Almasihi ka na'buugu in'dili. 15 Kadu na efe ka 'di no taalo kara tefe ka 'di ma nanggeyi tanno eene, lakiini ma ömö'di tiya eyi ka üüdü meene afiki'dö afe'de. 16 Kondho mo ka kadu tanno aama no ma feene nja kondho ma inde a kadu na oolonadene no tunya ma tefe ka 'di ma tamana kadu keefe ka 'di. Mada i'i yungngo ara tambaanya eema ya? 17 Taalo unngngo kanadene a tumma ma Masala dhabbu afa kadu öccö, lakiini keema unngngo tumma ma Almasihi dhorro kidha ma Masala kada kadu tanno oono.

3

1 Kafada unngngo angnga tafünügü nanggeyi naaja ko'do afe'de? Alla kasaasa unngngo waraga afa kadu könö ma talaana ndama aaga alla co aaga? 2 Aaga ka waraga tiya iidi ya ikirinja kidi ka nanggeedi ussudene a kadu nye'd'de tiiroönö.

3 Kussudene aaga ka waraga tiya Almasihi, ö'dö ndama linggo niidi taalo arigiridene ana ünggölü, lakiini a Koronggore tiya Masala ma adinö mo, taalo ikirinja ka maraayo ma misi, lakiini ka maraayo ma nanggeedi ma tadü'd'dü.

4 Kamma unngngo ana eedi dhorro ana Almasihi ka Masala kidha. 5 Taalo unngngo kiki a'da unngngo küüni eema a tussu tanno iidi, lakiini türü niidi ndama Masala. 6 Oogo mungngo manangnga unngngo ka tambaanya linggo ma timi'di tumma ma 'bitingngö, ya taalo ma tarigiri ma seriye, lakiini ma Koronggore, seriye

ya arigiridene ö'dö ana inde, lakiini Koronggore ö'dö a tefe ka 'di.

Tidhindhî ma timi'di tumma ma 'bitingngö

⁷ Üürü linggo ma inde ko'dodene a kireere'be ka niigisi kö'dö a tidhindhî amang ka laala ya Israyil taalo kambaanya tadinö dhugudha ya Müüsa kudumma tidhindhî ma dhugudha tiya iini ya ara saga titaalo ya. ⁸ Taalo linggo ma Koronggore kara kakogoona ma tidhindhî? ⁹ Üürü linggo ma tasigi kadu ka tidhindhî ya, ara tii'baana dhorro a linggo ma tidhindhî tanno ara tö'dö a toolona. ¹⁰ Nïimö ya akadhindhî ya taalo tidhindhî kini 'bitingngö a'dugadene kudumma tidhindhî ka tagii'bi i'i 'bitingngö no. ¹¹ Üürü nïimö ara titaalo ya öö'dö a tidhindhî ara tidhindhî na tiya ara tö'dö a tefe ka 'di ta'billi ya tafaanya.

¹² Kudumma aja ka tindhigî no ya, kalinggo unngo 'büini kungngo. ¹³ Taalo unngo kafeene nja Müüsa ya kaküdhü ten'di iini ka iïye, amang ka laala ma Israyil tafa tiji töyeene ma titaalo ma tidhindhî tanno eene. ¹⁴ Nanggüüdü neene ka tangga'da ta'bitingngö, nanggüüdü neene katünküdhü a ten'di tiya miini ya, kene ka tüüri sorne ma timi'di tumma ma 'billi, ara ten'di tatandhaka ka ömö'di kara tuurna Almasiïhi keere. ¹⁵ Lakiini ta'bitingngö aleefe ten'di kene ka nanggeedi ka tüüröönö ma seriye ya Müüsa. ¹⁶ Ka ömö'di kara tapadaga ka Uugaara ara ten'di ma taküdhü iïye tatandhaka. ¹⁷ 'Bitingngö

Uugaara i'i ya Koronggore, a 'buugu ya Koronggore ya Uugaara ka tanna kide ya, ara tahürra tanna kide. ¹⁸ Angnga in'dili kungngo kiji angnga tidhindhi ma Uugaara ana iye ka tatandhaka afa almandara angnga takatem'bele kada Koronggore tiya miini ya, ka tidhindhi na ödö ndama Uugaara, i'i ya Koronggore.

4

Eema ka nadhafala

¹ I'i yungngo a Masala ka anangnga 'bangnga unnggo ka linggo tanno, taalo unnggo kara tari'ba. ² Kaadha unnggo ka eema tiya ka raaya ya, taalo kaneene ana ünggü ka nanggeedi, unnggo taalo küsini kadu a tumma ma Masala. Lakiini kala unnggo tumma ma timin'da unnggo takindhigi oona niidi ko'do a tumma miini co ka kadu ka nanggeedi kidha ma Masala. ³ Üürü tumma ma Injili niidi ka tadünnü no ka küdhü, eege ka tunggüdhü a kadu tanno aama no. ⁴ Eege taalo kamma, kudumma masala ma 'büdhülü tiya a'binyni eege ka iye amang kene tafa tiji töyeene na öyeene ada kene no, töyeene ma tumma ma Injili ma tidhindhi na Almasihi, ya koronggore ma Masala ya. ⁵ Taalo unnggo keema tumma ma eyi tiya iidi, lakiini a tumma ma Yasu Almasihi ya Uugaara ya, kalinggo ada aaga kada kasaga ka üüdü ma Yasu. ⁶ Kudumma Masala ka tiki a'da, "Fa ka töyeene ka ödö kürö ndama ndüüli mo," oogo mungngo manangnga töyeene noono kidi ka nanggeedi, amang ka

töyeene ma tussu eema ma tïdhindhï na Masala ka dhugudha tiya Yasu Almasiïhi.

⁷ Ungngo ka nadhafala ma tam'bala ma tïmmü eema ya, amang kini tussu adene in'dïli a'da türü na Masala eege kamiini taalo nïidi. ⁸ Tatoroko ka dhigi ungnö ku'bu ka na'buugu in'dïli, lakiini taalo ka'dinggö, ungnö tadhere lakiini taalo ungnö kagi'di. ⁹ A kadu talinggo ungnö, illi Masala taalo maadha kïdi, ungnö ta'dinggeene illi ungnö taalo ka taaya. ¹⁰ Ungngo 'bucca kümme dhügürü ma inde tanno Yasu amang ka tefe ka 'di tanno iini tanna kïdi ka oona. ¹¹ Ungngo na efe ka 'di no ara ungnö takeke 'bucca ka üüdü ma Yasu amang ka tefe ka 'di tanno iini tijidene ka tuu'da tanno iidi kara titaalo no. ¹² Nggeege inde kalinggo kïdi ka oona, lakiini tefe ka 'di kungngo ada.

¹³ Sorne iki, “Nageema a'a kudumma eede ka tamma.” A koronggore ma tamma tiya kïdi ya, angnga tageema kudumma aja ka tagamma. ¹⁴ Kussu ungnö a'da Masala mafiki'dö Uugaara Yasu ka inde ya, ara tanangnga angnga ka fiki'dö ka inde afe'de ana Yasu, öö'dö ana aaga nja ungnö kono kidha. ¹⁵ Eema ya nye'd'de kudumma aaga, Masala mamana eema angnga dhabbu, a kadu no amana ta'diila a Masala nja tïdhindhï tanno adhabbu no.

Tefe ka 'di a tamma ka Masala

¹⁶ Nggeege taalo angnga kara kari'ba, salla a tuu'da naaja saga titaalo, illi ömö'di ya ka tuu'da ka teene ya, ara tindinaana oona a naganuuru.

17 Kudumma 'bandhügürü tiya idhilli ya ya ara titaalo ya yaaja ka dhügürü ya indinaana tidhindhi angnga ta'billi. 18 Kudumma aja taalo kanaana iye ka eema tiya aja kijöögö ya, illi eema yaaja ka titaalo kijöögö ya, eema yaaja kijöögö 'bitingngö ara titaalo, illi eema yaaja ka titaalo kijöögö ya, i'i yungnga ara tütü ta'billi.

5

Tefe ka 'di naaja ka 'dotombo'do

1 Kussu angnga a'da fangga ma 'büdhlü maaja ka taganna kide mo mara türrüdü, nöö'di naaja kungnga ka 'dotombo'do ta'billi a Masala ka tarü'bünü angnga taalo ka arü'bü adene ana iisine ma nakömö'di. 2 Angnga 'bitingngö ka tadinigöögö angnga ma tasaasa 'di ya 'dotombo'do ka kirjinja kaja ka oona. 3 A kaja kara tagirni i'i kaja ka oona ya, taalo angnga kara taganeene ana oona ku'bu. 4 A 'bitingngö kaganna angnga ka fangga ma 'büdhlü, angnga tagüüni muuyu ana eema ka tindhi kaja taalo a'da angnga kasaasa takirno ku'bu, lakiini angnga tagirni kide ko'do amang ka tefe ka 'di ta'duuru niimö ya ara titaalo ya. 5 Lakiini Masala oogo mungnga makindinaana fiini ya kaja ku'bu manangnga tümme ku'bu ma Koronggore angnga amang kaja tussu iini.

6 Lakiini ta'bitingngö kütü angnga ka tamma dhorro, kussu angnga tumma aja ka tanna ka tuu'da tanno ka ku'b'ba ka Uugaara ku'bu no. 7 Angnga keefe ka 'di a tamma ma Masala taalo a niimö tiya aja ka tinö kide ya. 8 Kidhi

angnga oona ku'bu angnga tasaasa tö'dö kürö ndama tuu'da tanno ara angnga ka taneene nja Uugaara. ⁹ Salla angnga saga taneene aja ka tanna ku'b'ba, angnga kasaasa Uugaara ka tamma kaja. ¹⁰ Kudumma aja in'dilī kungngo ara angnga ka'dingnge kidha ma tahükümü ya Almasihi, amang ka ömö'di taluna nīimö yiini ka tagalinggo a'da akaleefe ka tuu'da, üürü ka'diila üürü ka toroko.

Linggo nja ta'diila nja Masala

¹¹ Kussu ungnö tikiri ka tussu ri'ba ma Uugaara, ungnö teema nja kadu a'da Masala mussu ungnö dhorro a'a nasaasa a'da aaga tussu ungnö ana eedi tiya ada afe'de. ¹² Taalo ungnö kafünügü nanggeyi nīidi ko'do kada kidha afe'de, lakiini kasaasa ungnö tafa'da fiini aaga, amang kada tafünügü ungnö ko'do, amang kada taluna nīimö yaada ka asaasa tüüni iini a kadu tanno alaala oona a kadu ndama kürö ün'dügüngngö a'da taalo ndama eedi ka teene. ¹³ Üürü ungnö kanagaaga ya, kanagaaga ungnö a Masala. Üürü ungnö ka'dara ya ungnö ka'dara kudumma aaga. ¹⁴ Kudumma aja kada kasaga ma tasaasa tanno Almasihi a'bunu ungnö kide, kaja ka ndagussu a'da ömö'di ungnö eyi ka üüdü ma kadu nye'd'de, kadu nye'd'de kaaya nja iini. ¹⁵ I'i eyi ka üüdü meene nye'd'de kungngo, kadu na efe ka 'di no taalo kara tefe ka 'di ma nanggeyi tanno eene. Lakiini ma ömö'di tiya eyi afiki'dö afe'de ka üüdü meene ya.

16 Ndama uuru tanno taalo ungngo kussu ömö'di ka tatuu'da, kakussu ungngo Almasiihi ka tuu'da, illi 'bitingngö taalo ungngo kussu i'i nggeege afe'de. 17 Üürü ka ömö'di kara taneene nja Almasiihi ya, ara tamö'di tiya insili ya, eema ya illi ya anda taalo, eema nye'd'de anda issi. 18 Eema ya nye'd'de ö'dö ndama Masala muuraana angnga ka oona nja Almasiihi mo, manangnga linggo ungngo ma tuuraana a kadu ka oona. 19 Masala muuraana kadu ka oona nye'd'de nja Almasiihi a ta'diila ma eyi tiya oono, taalo ümmü eege ka tatoroko tanno eene, manangnga ungngo ka teema tumma ma tuuraana ka oona. 20 Angnga kungngo keema tumma ma Almasiihi, afa Masala oogo mungngo ma eema ana onngo'do tanno aja, yungngo iidü kadeema nja aaga ana eere ma Almasiihi a'da aaga ta töönjülü, aaga tümmü ajeene nja Masala. 21 Masala manangnga ömö'di ya taalo üüni tatoroko ka tatoroko ka üüdü ma angnga amang kaja ta'diila kidha ma Masala ana i'i.

6

1 Ka linggo tanno iidü nja Masala no, kasaasa ungngo aaga na amma ka türü tanno Masala no, aaga tafa tümmöönö kada eema ün'dügüngngö.

2 Oogo makiki,

“Ka uuru meede ka tamma ya, naföönyö a'a tumma nüüdü,
a ka uuru ma Masala ka tamma, uuru ma toolona naga kinyi a'a o'o ko'do.”

Ara a'a tadirina tumma o'o 'bitingngö uuru ma toolona eege kungngo.

Dhügürü ya Bölis

³ Ungngo taalo kasaasa takara ka ömö'di kidha ii'di tumma tagu ungnngo. ⁴ Linggo nñidi ka talinggo no kasaasa ungnngo a'da kussu adene a'da linggo na Masala eege kamiini, a tidhi oona ku'bu ka dhügürü miini, ka talinggo adene nja dhügürü. ⁵ Tabbü adene nja tapusu adene nja taga'da 'buugu adhügürü tadinigöögö a taneene ana iire. ⁶ Ka tinsili ma eedi nja tussu eema nja tidhi oona ku'bu, nja 'bangnga nja muuyu ka Koronggore tiya Insili ya, nja tasaasa ajeene dhorro. ⁷ A tumma ma timin'da nja türü tanno Masala nja eema ma koro'bo tiya a'diila ya ka nñisö ma kuri nja nñisö ma küüle. ⁸ Ka tidhindhi nja midhi, kümmü ungnngo kada oroko kümmü ungnngo ka'diila ungnngo katimin'da, lakiini kümmü ungnngo kada korokoro. ⁹ Taalo kussu adene ungnngo lakiini kümmü ungnngo a'da kussu adene, ungnngo taaya lakiini kefe ungnngo ka 'di, ungnngo tabbü adene lakiini taalo kagirinadene. ¹⁰ Kamüürü ungnngo lakiini ungnngo ka dhodho turi kungngo, taalo eema kide illi kadu ka tüüsü kadhabbu, afeene afa taalo eema kide illi ungnngo kana eema in'dili.

¹¹ Ka kadu ma Kurnusus ka keema ungnngo tumma ma timin'da nja aaga, ungnngo tafa'da nanggeedi nñidi aaga nye'd'de, ¹² taalo ungnngo kümmü nanggeedi ma aaga, lakiini aaga kungngo kümmü nanggeedi ma ungnngo adha. ¹³ Nggeege a'a neema a'a nja aaga 'bitingngö afa

maada kada laala tiya eede kungngo, aaga üüni ana ungnogo afa müidi ka tüüni ana aaga, aaga fada nanggeedi naada ungnogo ka sigiiri.

Aaga fa toso nja kadu tanno kitaalo kamma ka Masala no

¹⁴ Aaga fa toso ka dholle tanno ungnodho no nja kadu tanno taalo kamma ka Masala no. Minna yungngo ara tuuraana ta'diila ka oona nja tatoroko? A minna i'i yungngo ara tuuraana töyeene ka oona nja ndüüli? ¹⁵ Taalo niimö ma tuuraana Almasihi ka oona nja Ebliisi? A minna i'i yungngo ara tuuraana ömö'di ya amma ka Masala ya ka oona nja tiya taalo amma ya? ¹⁶ Taalo la ma Masala ara tullu ana koono nja la ma namasala ma 'büdhülü? Angnga ka nöö'di ma Masala tammo efe ka 'di mo, afa ma Masala ka tiki, "Ara a'a taneene nja eene nunggeene nja eene kene ka söödö na a'a ta Masala tammo eene kada kadu tanno eede." ¹⁷ I'i yungngo a Masala ka tiki,

"Aaga aadha eene ka oona,
aaga tafa taneene nja eene.
Aaga fa tummy eema ya nyoro ya ka oona,
amang kede tamma kada."

¹⁸ Masala mana türü mo miki, "Ara a'a ta Pupa tiya ada
aaga ta laala tiya eede."

7

¹ Üürü timi'di tamma no nye'd'de kungngo, Masala manangnga angnga nagöre eede, kada

6:16 6.16 Lawi 26.12; Armiya 32.38 **6:17** 6.17 Asaiya 52.11

6:18 6.18 2 Samwiil 7.14

kagala tuu'da naaja kinsili ka tatoroko ma tuu'da nja koronggore, angnga taganeene ka tinsili ma ri'ba ma Masala.

Bölis adhodho

² Aaga amma kidi a nanggeedi, taalo unngo küüni ada ömö'di ku'bu, nja talinggo eema ya toroko ya nja tallogo ma eema tiya ömö'di töccö. ³ Taalo a'a nadiri tumma no ma tasigi aaga, nilli a'a ka tiraana kadhada a'da aaga kungngo iidi ka nanggeedi a'da angnga taganeene ka'dügüllü angnga takaaya ka'dügüllü. ⁴ Namma a'a kudumma aaga dhorro nabbü 'daniisö ana aaga nafünügünja ko'do nja dhögürü tiya iidi ya, eedi yeede adigine a ta'diila dhorro a dhodho.

⁵ Taalo tuu'da niidi ka kagünü 'do jiddi miidi köö'dö ka Makadoniya, ka'dinggö unngo ka ta'digineene nja diidi kürö nja ri'ba ka teene. ⁶ Lakiini Masala mamana tiicolo aja ka nanggeedi muu'bu unngo ka eedi ka tö'dö tanno Tito. ⁷ Taalo ka tö'dö tanno iini ungodho eege, lakiini ka ta'diila tanno iini ka tuna kada no, ka'diila oona eede kini ka tirina tumma ma aaga unngo, ka tasaasa tanno ada nja fara tiya ada nja tagu'daana ka eedi tanno ada kudumma a'a, amang kede tadhodho dhorro.

⁸ Üürü a'a nangnga aaga ka koroo'bo a waraga tiya eede ya, taalo a'a nara tema kada kussu a'da aaga kada kussu a'a adha, nussu a'a a'da waraga ya anangnga aaga ka koroo'bo lakiini ara tagünü idhilli. ⁹ Nadhodho a'a 'bitingngö taalo kudumma eede kafa kada aaga tagoroo'bo, kudumma ada kagoroo'bo a fiini ma tussu kide

afa ma Masala ka asaasa ungngo taalo kili aaga ka oona. ¹⁰ Kudumma tagoroo'bo ma tussu kide ana Masala ya kiji atö'dö a taadha ka tam'baga ma toolonadene a'da kitaalo tagoroo'bo kide, lakiini tagoroo'bo ma kadu ma 'büdhlülü ya, kicci tö'dö ana inde.

¹¹ Aaga assa ka tagoroo'bo tanno ada a tussu kide tanno Masala no manangnga aaga kanaana iyye kide, ri'ba naada nja tasaasa nja tagu'daana ka eedi nja ta'diinö ka eema nye'd'de, kussu kadu kinsili aaga ka nanggeedi ka eema tiya 'do. ¹² Aminna üürü a'a narigiri ada aaga, taalo kudumma ömö'di tiya üünü ada kadu ku'bu ya nja tiya üninja ku'bu ya, lakiini amang kada tijöögö kadha ma Masala a nanggeyi tanno ada kadakardha ku'bu ma ungngo. ¹³ Aaga kungngo kanangnga ungngo ka tidhi oona ku'bu, lakiini dhodho nüüdi kadhabbu 'do kudumma dhodho tanno Tito kudumma koronggore tiya iini ka ta'baga oona ku'bu ana aaga in'dili kungngo.

¹⁴ Nala a'a ta'diniga oona coo'do neede iini ana aaga taalo kanangnga a'a kaana modolo. Lakiini eema yüüdi kadiraana aaga ya nye'd'de aga timin'da, yungngo ta'diniga oona nüüdi ana aaga co Tito, kütü ka co ööye miini dhorro.

¹⁵ Eedi yiini akogoona ma tasaasa aaga, kini kara tagiigi taföönyö eema naada in'dili nja tamma kini nja tamma kini tanno ada a ri'ba ma Masala a ta'deedene ka oona. ¹⁶ Ka'diila oona eede namma ka tumma tanno ada ma eema nye'd'de.

8

Tawaana ma gürüüsü koono

¹ A 'bitingngö nagöre eede, kasaasa ungngo a'da aaga tussu a'da minna a türü ma Masala ka tagalinggo a kadu ma nakaniisa ka Makadoniya. ² Ka dhügürü tiya eene ya dhabbu ya, ya Masala ka ta'b'ba eege iini ya, kadhodho dhodho na dhabbu no, a tassa keema neene dhindho no, tagala kanangnga eege kana eema dhabbu a tamana eema ku'bu tanno eene. ³ Ara a'a tiki aaga a'da kanangnga ku'bu dhabbu ndama nanggeedi tanno eene ka teene, adhabbu adagii'bi türü neene. ⁴ Kaga'bunu angnga kide, kasaasa a'da eege toso ka tonsoona ma eema ma tunggu co a kadu ma kaniisa. ⁵ Kagala kadagalinggo adhabbu adha, yiidü ka tagümmöönö ka nanggüüdü ya, kümmünü nanggeyi neene Ugaara ka dhidha, kassa ka tamma kidü a tasaasa ma eedi tiya Masala.

⁶ Kiki ungngo a Tito a'da atüimö linggo ma baraka nja aaga, afa miini ka ata tüm'bü miini ku'bu kungngo. ⁷ Kana aaga eema nye'd'de kungngo, tamma ka Masala nja tumma, nja ta'dara, nja tasaasa ta kinya eema a kadu nja tasaasa tanno ada nja ungngo no, ungngo tasaasa aaga afe'de a'da aaga takardha ku'bu ka linggo ma tasaasa ajeene ma türü, ⁸ taalo a'a na'buna aaga kide, lakiini a'a nasaasa tassa ka tasaasa ma kadu könö ka dhorro ma tara tussu a'da ka köje tasaasa naada nya? ⁹ Kussu aaga türü na Ugaara tiya aja Yasu Almasiihi üpü eyi yiini co kudumma angnga a'da eema ungngo iini nye'd'de, amang kada tana eema a ta'döngngönyö tanno iini.

¹⁰ Tumma neede kiki, a'diila nja aaga ada kara

tatiimö naada ka tata tüm'bü miini kambele no, kudumma ada aaga kungngo kasaasa ka dhidha.

¹¹ Aaga tiimö linggo 'bitingngö amang ka tasaasa tanno ada tunggeene nja tatiimö tanno kada no.

¹² Üürü aaga kasaasa tanangnga eema ku'bu, ara Masala tamma ka niimö tiya ada kanangnga ku'bu ya, taalo ka eema tiya taalo ya.

¹³ Taalo a'a niki a'da aaga tadhügürü ara kadu öccö ka lingnge, lakiini a'a niki a'da aaga taneene kada köje. ¹⁴ Aaga tinya eema a kadu tanno eema katitaalo kene no, amang kene tinya eema aaga kini kara titaalo kada taka öccö, amang ka eema taköje kada. ¹⁵ Sorne ma Masala iki, "Ömö'di ya awaana eema koono dhabbu ya, taalo ara türeene kini, ömö'di ya awaana eema koono idhilli ya, taalo niimö ara titaalo kini."

Tito agürünüdene ma co Kürünsüs

¹⁶ Nanangnga a'a ta'diila a Masala kono ka anangnga tumma ma linggo tanno ka Tito ka eedi afa meede kanaana iyye kada kungngo.

¹⁷ Taalo i'i akogoona ma tamanaga eema angnga sugi, lakiini i'i akardha ku'bu adinigöögö ma tasaasa tö'dö kada kanna ndama eedi tiya iini ungodho i'i. ¹⁸ Kagürünü unnggo örre ma angnga ya nja iini, ya kadu ma nakaniisa ka tafünügü i'i ko'do ka linggo kudumma ma İnjili ya.

¹⁹ Afe'de ya, kadu ma kaniisa kagesse i'i miini ka tunggeene nja unnggo ma talinggo linggo na 'diila no, niidi ka talinggo no ma tafünügü Ugaara ko'do, ma tussu a'da unnggo kasaasa

takinyi aaga, ²⁰ kakardha ungnngo ku'bu iidi ömö'di öccö tanangnga hetti ungnngo ka eema ya a'diila ya. ²¹ Tumma niidi ka tümmoonö ka nanggeedi no 'do, a'da ungnngo talinggo eema ya a'diila ya, taalo ka Uugaara kidha ungnngodho oogo, lakiini ka kadu kidha afe'de.

²² Kagürünü ungnngo örre ma angnga nja eene, yidi ka tagiiri linggo niini ungnngo taluna i'i ussu ka eema dhabbu, a 'bitingngö amma kada ana eedi dhorro. ²³ A Tito ya akinyi linggo nja a'a kada kannu, a nagöre ma angnga na ungngeene nja iini no, eege kadafiini ma nakaniisa, Almasi-ihii ara tafünügünja ko'do ana eege. ²⁴ Nggeege aaga ala tasaasa naada a kadu dhorro a niimö ya anangnga angnga ka ta'diniga oona naaja coo'do ana aaga amang ka nakaniisa tijöögö.

9

¹ Taalo ama eede ka rigiri ada ka waraga aaga ma eema tiya kadu kagürünügi iini ma tunggu co kadu tanno Masala. ² Nussu a'a linggo naada na a'a tadhodho iini kidha ma kadu ma Makadoniya, niki eene a'da nagöre ma angnga no ka Akaiya no kindinaana oona ku'bu ma kambele ma tanangnga ku'bu, a tagu'daana ka eedi naada ka anangnga eege ka tüüni nggeege. ³ Lakiini a'a nagürünü nagöre ma angnga no kada, kudumma ta'diniga oona tanno iidi ana aaga, tanggaaga ta niimö ün'dügüngngö amang kada tindinaana oona ku'bu afa ma tiya eede ka tiki aaga ya kungngo. ⁴ Nari'ba eede kara tö'dö nja kadu ma Makadoniya, öccö kaluna aaga kitaalo kindinaana oona ku'bu, a modolo

tümmü angnga amang kede tafa teema a'da aaga kungngo ka anangnga ungngo ka tadhodho. ⁵ Yungngo eede ka tiki a'da a'diila eede kara tiki a nagöre ma angnga a'da kadhe a'a köö'dö kada aaga tindinaana eema yaada kindinaana ku'bu dhabbu taalo ndama rüsü.

Leele dhabbu

⁶ Amang kada tagiigi a'da ömö'di ya adiniigi idhilli ya ara migile miini tidhilli, ömö'di ya adiniigi dhabbu ya ara migile miini tadhhabbu.

⁷ Ömö'di ya asaasa tamana eema ku'bu amana ku'bu afa ma tiya iini ka tiraana ana eedi tiya iini ya, taalo tümmü rüümü taalo ömö'di ma ta'bunu i'i kide, a tagussu tafa tagu i'i kudumma ömö'di tiya amana eema a kadu ana eedi ka tinsili ya Masala masaasa i'i. ⁸ Masala mambaanya tagusu türü nye'd'de ka eema nye'd'de nja naganuuru aaga tana eema yaada kasaasa ya eema ya a'diila ya tagusunja aaga ka linggo tanno a'diila no in'dili. ⁹ Afa ma sorne ka tiki,

“Asümünaana eema ku'bu na anangnga a kadu tanno eema katitaalo kene no dhabbu, ta'diila niini a tütü ta'billi.”

¹⁰ Masala mamana tööyö a taleele nja miteene ma taguri ya mo, mara tanangnga nasigeene ka'diila a migile tadhhabbu ma ta'diila ma nanggeedi tanno ada. ¹¹ A Masala tanangnga aaga kadüüsü ka eema nye'd'de kungngo, amang kada tamana a kadu turi amang ka kadu tamana ta'diila a Masala kudumma ungngo.

12 Tafiki'dö a linggo tanno a'diila no taalo köödhî ka tamana eema a kadu tanno Masala sugi, lakiini anangnga kadu kamana ta'diila a Masala dhabbu afe'de. 13 Kadu katafünügü Masala ko'do kudumma tamma tanno ada nja taföonyö tumma ma İnjiili nja ada kamana eema tanno ada ku'bu. Aaga toso kide nja eene nja kadu töccö afe'de. 14 Kafara ka Masala kudumma aaga ana nangeedi tanno eene, ara co kada kudumma türü tanno Masala na dhabbu no kanangnga aaga no. 15 Angnga tanangnga ta'diila a Masala ka türü tiya oono ka amana angnga dhabbu, taalo ömö'di ma tambaanya teema kide.

10

Bölis ümmöönö ka eyi tiya iini

1 A'a na Bölis, nasaasa aaga ana eedi ka tiicolo nja tidhi oona ku'bu na Almasihi, a kadu könö tiki a'da, kede kara taneene nja aaga niicolo ka eedi, lakiini eede ka tanna ku'b'ba na rüsü. 2 Nasaasa a'da eede kara taneene nja aaga ya, aaga tafa tanangnga a'a ka tarüsü, rüsü neede kara taneene nja kadu iini kara tiki kide a'da unngo kaneene taneene ma tuu'da. 3 Kaneene angnga a tuu'da ma tadü'd'dü, lakiini angnga taalo keema koro'bo ma eema ma tuu'da. 4 Eema ma koro'bo yïidi taalo ama tuu'da ma tadü'd'dü, lakiini türü na Masala kara ta'böyö tarü'böönö na kïdhö no ku'bu. 5 Unngo tarüdü ta'diniga oona coo'do nja niimö tiya akara ada diidi ma tussu tumma ma Masala anangnga tumma nye'd'de ka pabuusu, angnga tanangnga

i'i kaföonyö tumma na Almasiihi. ⁶ Kada ka tümümü tumma ma Masala dhorro ya, ikiri ungnö ka tapusu kadu na silli eema no a tatiimö taföonyö naada.

⁷ Kadinö aaga niimö ndama kürö miini, ömö'di ya ussu eyi yiini a'da i'i ya ömö'di tiya Almasiihi ya, fa kini ada dhorro kudumma iini ka tatiya Almasiihi ya, ungnö afe'de ka tanno Almasiihi afa i'i. ⁸ Taalo modolo magu a'a salla na'diniga oona coo'do a tauugaara tanno Masala ka anangnga ungnö no, ma tindinaana aaga taalo ma taga'da aaga. ⁹ Afa tafeene afa nuurugu ri'ba ada ka nanggeedi, ana kawaraga tiya. ¹⁰ Ara ömö'di könö ana kada a tiki a'da, "Waraga ya Bölis idhindhä indhë, lakiini kini ka taneene nja angnga a 'bangnga ka oona, a tumma niini taalo ka idhindhä." ¹¹ Amang kene tussu kidi karigiri ada ka waraga a'da kitaalo ungnö kütü kafeene nja tiya iidä kataneene nja aaga ya kungnö.

¹² Taalo ungnö kara tambaanya toso nanggeyi niidä ku'bu afa kadu na funügü nanggeyi neene no ko'do, eege kagesse nanggeyi neene ku'bu ungnö eege ka köje ana oona neene ka oona ungnö eege a'da taalo ka'dara. ¹³ Lakiini ungnö taalo kara ta'diniga oona ko'do iini, lakiini tamana ma ndhiginö tanno Masala ka anangnga ungnö no ndhiginö na Masala afa kaja ungnö tala aaga. ¹⁴ Taalo ungnö karisi ko'do a ta'diniga oona coo'do tanno iidä. Üürü ungnö taalo kö'dö kada, kudumma iidä ka tagöö'dö kada dhorro a'da Injili ma Almasiihi mungnö iidä. ¹⁵ Taalo

ungngo ka'diniga nanggeyi nīdī coo'do ka linggo tanno kadu kōnō ka talinggo no, lakiini kasaasa ungnō tassa ka tamma naada tinggiridene ikiri ndhiginō ma linggo naaja tadhabbu ka ndhiginō.

¹⁶ Ara ungnō teema tumma ma Īnjīlī no ku'b'ba ka naanya tanno ada no, taalo ungnō ta'diniga oona nīdī coo'do ka linggo tanno omō'di töccō ka ndhiginō ma linggo tanno iini. ¹⁷ Lakiini, “Omō'di ya 'dinigi eyi yiini coo'do ya, fa kini a'diniga eyi yiini coo'do ana Ugaara.” ¹⁸ Taalo omō'di ya afünügü eyi yiini ko'do, i'i yungngo adho ka fiini, illi omō'di ya Ugaara ka tafünügü i'i ko'do ya.

11

Bölis nja kadafīni tanno korokoro no

¹ A'a nasaasa a'da aaga tidhi nanggeedi ku'bu a 'banda'baga tiya eede ya idhilli ya, lakiini aaga kümümü aaga a'a nggeege. ² A'a nagu'daana ka eedi ma aaga ka Masala kidha, kudumma eede ka tagümmünü aaga ku'bu ma omō'di ungnōdho ya Almasihi amang kede tanangnga aaga iini afa talōmü minsili mo. ³ Lakiini a'a nari'ba afa ni ka takīisini Hawa ana ünggü tammo iini, ara nanggüdü naada taga'dadene nggeege ka fiini ma tamma ka Almasihi. ⁴ Üürü omō'di öccō öö'dō kada, eema tumma ma Yasu kōnō a'da taalo Yasu yīdī ka teema iini nja ada kara ta'duga koronggore öccō keefe taalo afeene nja tiya ada ka'duga, alla Īnjīlī keefe taalo mafeene nja tammo ada ka'duga mo, ara kagala ka'diila.

⁵ Niiiri a'a eyi yeede a'da taalo a'a no idhilli ka kadafiini tanno iifi no. ⁶ Üürü tumma ka kii'bi a'a ya, taalo tussu eema kara tii'bi a'a, lakiini kussu adene unngo ka eema nye'd'de.

⁷ Alla a'a natoroko kudumma eede ka öö'dö a tumma ma Masala aaga a'da taalo faana kide, nüpu eyi yeede co, ara aaga kico aadha?

⁸ Namma a'a ma ta'duga gürüüsi ka nakaniisa könö amang kede tamünügü aaga ko'do iini.

⁹ Kede ka taganeene nja aaga a'da taalo niimö kede, lakiini taalo nakan'dana ka ömö'di a'da anangnga niimö a'a, nagöre ma angnga na ö'dö ndama Makadoniya no kamana eema a'a nye'd'de, yungngo eede ka takardha ku'bu a'da nafa tanyamanya aaga ka oona ma eema i'ndili, yungngo eede ka tümmü eyi yeede dhorro. ¹⁰ Ka tumma tanno Almasihi ka tanna kede timin'da ya, taalo ömö'di ka naanya ma Akaiya tafaga a'a keere ka a'diniga oona tanno eede coo'do.

¹¹ Aminna? Kudumma a'a taalo nasaasa aaga? Masala mussu tumma eede ka asaasa aaga.

¹² Lakiini yeede ka talinggo 'bitingngö ya, ara a'a tütü ka tüüni eema yeede ka tüüni, amang kede taadha kadu na kiki a'da eege ka'diniga oona coo'do, kalinggo afa mungngo kungngo.

¹³ Eege ka kadafiini tanno korokoro no, kalinggo ma tüsini kadu kümmü nanggeyi kada kadafiini tanno Almasihi. ¹⁴ Taalo aaga kama tadhere, kudumma Ebliisi kara tatem'bele oona niini afeene nja tadhangga ma töyeene. ¹⁵ Taalo tadhere eege kungngo, üürü kadu ma linggo niini küüni ünggü a'da eege ka kadu ma linggo tanno a'diila no. Keere kungngo Masala mara tapusu

eege ka tatoroko ma linggo tanno eene no.

Bölis eema tumma ma dhügürü tanno iini

¹⁶ Ara a'a teema afe'de, taalo ömö'di öccö tiki kide a'da a'a na'baga, lakiini aaga amma kede salla ka taa'baga amang kede taduna niimö yeede ka ta'diniga oona coo'do iini. ¹⁷ Tumma neede ka teema no taalo tumma na Uugaara eege kamiini, lakiini a'a na'diniga oona coo'do afa 'baga. ¹⁸ Tumma ma kadu ma 'büdhülü ka'diniga oona coo'do, ara a'a ta'diniga tekere. ¹⁹ Aaga na 'dara no, aaga ambaanya kadu na nagaaga no a dhodho! ²⁰ Aaga ambaanya taneene ma kadu tanno ümmü aaga kada kasaga no, kanyooro aaga, kagu eema yaada, kamidhi aaga, kabbü aaga ka dhugudha. ²¹ Magu modolo a'a meede kara tiki a'da ungnö kagi'di ka oona ma linggo tanno. Üürü ömö'di öccö asaasa tabbü 'danüisö ma iini ya, neema a'a afa 'baga, ara a'a takardha ku'bu nabbü 'danüisö. ²² Üürü eege ka Ebraniin, a'a ka eyi yeede a'a na taga Ibrani taga Israyil, üürü ka kadaada tiya Abrahiim ya, a'a na 'bii'bala tiya Abrahiim afe'de. ²³ Üürü eege ka kadu ma linggo tanno Almasihi ya, ara a'a tiki afa ömö'di ya 'baga nagii'bi eege, nakambaanya a'a ta'b'badene nadagii'bi eege, nakete ka inde turi kungngo, naganna a'a ka pabuusu dhabbu nadagii'bi eege, nadakidhi oona ku'bu ka tabbü adene nadagii'bi eege. ²⁴ Kabbü Yahüüdü a'a tiidümmü, a tiiso kukumu ömö'di kaco iisine kafünü iidümmü afünü egiisö. ²⁵ Nabbü adene a maguufi tiidoona, katüidiri a'a a niigisi ta unggodho, a babüürü ta'bu ana a'a tiidoona,

niiyü ka söödö ma to uuru ana ooso miini. ²⁶ Ka tino tanno eede na dhabbu no, agalinggo 'biidi a'a ka naato, a kanyooro tagalinggo a'a, a Yahüüdü tagalinggo a'a nja tanno taalo ka Yahüüdü no, a kadu tagalinggo a'a ka naanya nja dhüile nja nagöre ma angnga no korokoro no. ²⁷ Nadhügürü a'a nüüni mananggöyö nja tadinigöögö turi, nja iire a tenege, nümmü tenege turi, natambaanya olle nja taneene ana oona ku'bu. ²⁸ Eema könö inggide afe'de, dhügürü meede ka tinigöögö ma nakaniisa nye'd'de kungngo. ²⁹ Ömö'di ka tagi'di na a'a tagi'di tekere? Ömö'di tara tüüni tam'baga a 'bangnga miini taalo tagu a'a?

³⁰ Üürü dhodho ma ta'diniga oona coo'do ka inggide, ara a'a ta'diniga oona neede coo'do a tagi'di tanno eede. ³¹ Masala nja Pupa tiya Uugaara Yasu mara tafünügünja ko'do ta'billi mo, mussu a'da taalo a'a nakorokoro. ³² Uugaara tiya linggo ada uugaara ya dhabbu ya ana eere a'da Alharis ya ma Demasak ya, anangnga kadu ka teere ka naginyeene ma anya meene kara tümmü a'a. ³³ Lakiini nagöre ma angnga kanangnga a'a ka singgili kimi'dina aru kide kadhiki a'a caa'bu ndama ööye ma ar'da, noolon-adene kini ka iisine.

12

Bölis iji eema ya tö'dö ya

¹ Ara a'a ta'diniga oona coo'do nadhodho. A'da nussu a'a taalo taduna nüimö kide ara

a'a tunggeene a tumma na ö'dönja no tanno Uugaara noono kala a'a kide no. ² Nussu a'a ömö'di ya Almasihi inggide aga'dugadene aco 'dotombo'do tanno iidoona. A nagürüünü miini ka ndö'dö kada'baaga kafünü ka egüüsö, taalo a'a nussu ömö'di ka tuu'da alla kürö ma tuu'da tanno iini, Masala oogo mussu. ³ Yeede ka tussu ya, ömö'di a'dugadene aco 'dotombo'do a tuu'da tanno iini alla ana oona ku'bu, taalo a'a nussu Masala oogo mussu. ⁴ Nussu a'a a'da a'dugadene aco 'di ma singgi nataföönyö tumma kide taalo tadü'd'dü ara tussu ka teema, itaalo ama iini ka tadünnü. ⁵ Ömö'di ya miini ya ara a'a ta'diniga oona coo'do miini, lakiini a'a taalo nara ta'diniga oona coo'do illi a tagi'di tanno eede. ⁶ Üürü a'a nasaasa ta'diniga oona coo'do ya, taalo a'a na taa'baga, kudumma eede ka teema tumma ma timin'da. Lakiini taalo a'a na ta'diniga oona coo'do ii'di ömö'di öccö teema tumma ma a'a nja iini ka tiji aföönyö kede.

⁷ Amang kede tafa ta'diniga oona coo'do ma tidhindhi ma tiya alanja a'a kakanangnga timmi kede ka tuu'da kada tafiini tiya Ebliisi ma tabbü a'a. ⁸ Nafara a'a ka Uugaara tiidoona a'da ma'duga kede ka oona. ⁹ İkirı ka tiki a'a, "Türü neede ka 'dimo küdü, kudumma türü tanno eede kussu adene ka tagi'di." Nikiri a'a ka tadhodho na'diniga oona coo'do a tagi'di tanno eede no amang ka türü tanno Almasihi taküdhü a'a ka oona. ¹⁰ Nggeege ya yungngo eede ka tadhodho ka tagi'di tanno eede nja teeladene nja midhi, a mananggööyö nja dhügürü ka üüdü ma Almasihi, kudumma eede kara tagi'di nana türü.

Bölis adinigöögö ma kadu ma Kürünsüs

¹¹ A'a nungngo nanda'baga, aaga kungngo kaga'bunu a'a kide. Aaga kama tafünügü a'a ko'do, üürü taalo a'a na nïimö ya, lakiini taalo a'a nadhilli ka "kadafiini tanno iifi no." ¹² Natakalaala eema aaga nidhi oona ku'bu kada ka söödö amang kada tussu a'da a'a tafiini, eema keefe a türü ma tale'bele eema. ¹³ Nïimö öccö yungngo ada ka titaalo kafeene nja türeene ma nakaniisa iini, illi tumma eede ka titaalo nanyamanya aaga ka oona a'da aaga tanangnga faana ma linggo tanno eede a'a. Aminna aaga fa kede ka eema tiya eede ka tagüünï ana aaga ya!

¹⁴ A'a nungngo nakindinaana oona ku'bu ma tara tö'dö kada kannaa asa tiidoona taalo a'a nara tanyamanya aaga ka oona lakiini nasaasa a'a aaga taalo almaala yaada, taalo laala indinaana eema ka kafaafa meene ku'bu, lakiini kafaafa eege kungngo kindinaana kene ku'bu. ¹⁵ Ara oona ta'diila eede kede kara taama eema yeede naama eyi yeede afe'de. Üürü a'a nasaasa aaga dhabbu 'dee ara aaga tasaasa a'a idhilli? ¹⁶ Afiigi nggeege taalo a'a nanyamanya aaga ka oona ma nïimö. Lakiini könö kiki a'da a'a nakorokoro. ¹⁷ Na'duga a'a nïimö kada ndama kadu tanno eede ka agürünü eege kada no? ¹⁸ Naga'bunu a'a Tito ka öö'dö kada nagürünü örre ma angnga nja iini, aga'duga Tito nïimö kada? Taalo unnggo kagalinggo a Koronggore tiya unnggodho ya, taalo unnggo kuurna fiini ya miini ya keere?

¹⁹ Kiki aaga kide a'da tamma nïidï no a'da unnggo ka ümmöönö ka eyi tiya iidi kada kidha? Keema unnggo ka Masala kidha ana Almasihi,

tumma no in'diili nagöre eede ma tindinaana aaga ku'bu. ²⁰ Nari'ba a'a eede kara tö'dö kada kannara a'a taluna ka fiini tiya ada kitaalo kasaasa a'a iini ya, aaga taduna a'a ka niimö yaada taalo kasaasa ya, nja eede ka taluna tagoroo'bo kada ka söödö, nja kirimi nja midhi nja tisaana ka oona nja tanu aana ka oona nja tadhe kadu nja tabbü na'dugiisine nja taga'da 'buugu. ²¹ Eede kara tö'dö afe'de ara Masala meede teela a'a nafara ma kadu kadhabbu na agüüni tam'baga ka dhidha no, kitaalo kaadha kide no, temelö nja füngngö nja kadu kadhoonyo nja tatoroko.

13

Tumma na eere no

¹ Tö'dö kada kada kannaneede kanda iidoona. Sorne iki a'da, "Niimö ya ara teemadene ma kadu keera nja eene ka tiidoona kadinö kide." ² Tö'dö kada kannaneede teera no, naganangnga a'a tumma a kadu tanno üüni tatoroko no, a'a nungngo nadirina afe'de a'da nitaalo a'a. Kede kara tafada taalo nara tana 'bangnga ma kadu tanno agüüni tatoroko kadhabbu no, alla kadu öccö. ³ Kudumma ada kasaasa tussu a'da Almasihi eema ana onngo'do tammo eede, Almasihi taalo agi'di ka oona ma talinggo nja aaga, lakiini i'i ana türü kada ka söödö. ⁴ A'da i'i abünnünja ka salii'bi a tagi'di tanno iini, illi i'i 'bitingngö efe ka 'di a türü tanno Masala. Ungngo afe'de kagi'di kini, lakiini a türü ma

Masala ara ungnngo tefe ka 'di ana i'i ma talingngo ada aaga.

⁵ Aaga iiri nanggeyi naada ta'diila, kümmü aaga tumma ma Masala dhorro aaga iiri eyi yaada alla taalo aaga kussu nanggeyi naada a'da Yasu Almasihi ungnngo ada ka oona? Illi kada ka tagi'digi ko'do ka ta'b'badene. ⁶ Kasaasa ungnngo a'da aaga tussu a'da taalo ungnngo kagi'di. ⁷ Kafara ungnngo ka Masala a'da aaga tafa talingngo eema ya toroko ya, taalo a'da ungnngo kii'baana, lakiini amang kada tüüni eema ya a'diila ya salla ungnngo a kadu saga tümmü ungnngo kagi'digi ko'do. ⁸ Taalo ungnngo kara tambaanya tüüni niimö ma tadiidi timin'da, lakiini kalingngo ada ungnngo a timin'da. ⁹ Kudumma iidi ka tadhodho kidi kara tagi'di, aaga tana türü, niimö yidi ka afara ka Masala kide ya a'da aaga tadho ka fiini aaga tinsili. ¹⁰ Narigiri ada aaga a'da nitaalo a'a kada kete amang kede tafa tüüni tatoroko ana aaga a'da a'a nungngo ata kete afa ma türü tanno Uugaara ka anangnga a'a no ma tindinaana aaga ku'bu taalo ma taga'da ada aaga ku'bu.

Töøjülü na eere no

¹¹ Keere kungngo nagöre eede, aaga adhodho, nungeene a'a ka fiini ma ta'diila, aaga toodo kede nasaasa a'a a'da aaga timi'di tumma ka ungnodho aaga taneene a ta'diila, a Masala ma tasaasa nja ta'diila, mara taneene nja aaga.

¹² Aaga töøjülü töøjülü na insili no. ¹³ Kadu ma kaniisa köøjülü aaga nye'd'de kungngo.

¹⁴ Fa ka türü tanno Uugaara Yasu Almasihi nja tasaasa ma Masala nja tagureene ma Koronggore tiya Insili aneene nja aaga nye'd'de kungngo.

Katcha

Katcha-Kadugli-Miri: Katcha (Old Testament)

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

PDF generated using Haiola and XeLaTeX on 22 Feb 2024 from source files dated 29 Jan 2022

bc98a4a0-1c85-5c7a-932a-7dcefd213f80